






# Bisu Millimmo

Leveled



Kuni irkisaanchu maxaafi ‘USAID’inni afi’nonni woxu irkonni  
‘Save the Children’i, Rosu Ministerenna Wodiidi Daga  
Dagoominna Manni Qoqqowu Mangiste Rosu Biiro mittimmate  
sumiimmenni qixxaawe attamamino.

2009 M.D



**USAID**  
FROM THE AMERICAN PEOPLE



**Save the Children**



The CC By license lets others distribute, adjust, and build upon this work, for free or commercially, as long as credit is given to the original creation. However, any changes from the original must be indicated.


For more info please refer: <https://creativecommons.org/licenses/>



# Bisu Millimmo

Kifile 4

Lamala 17



## Qaagiishsha

Aante shiqqino niwaawe (dhagge) illachishshannohu nabbawate huwato aanaati. Niwaawete albaanninna gedensaanni noo xa'mo dewartannota xawisatenni niwaawete mereero shiimare taxxi yitanni nabbabbinore xaphi assidhanno gede kaayyo uyiyyensa. Rosaano niwaawe nabbawate albaanni konni albaanni affinore kultanno gede xa'matenni jawaachishshensa. Konni garinni rosaanonnita niwaawe nabbawate hasatto kakkayissinihu gedensaanni niwaawe nabbawa hananfona. Rosaano irkissinanni baali, xa'muwa dawarate rosaano baala beeqqo assitanno gede jawaachishshensa. Uytanno dawarono haadhinanni taashshi'ri-tumo uyiyyensa.

### Nabbawate Albiidi Xa'mo

Biddissa: Niwaawe nabbawakkira balaxxe tenne woriidi xa'mo dawarate wo'naali.

1. Bisu millimmo maati?
2. Bisu millimmo sammi yine godo'lete calla assinannitenso horo noosete? Horo noosero may may horo noose?



## Gafa Mite

### Bisu Millimmo Hasiishsha

Ispoorte yaanno qaale woshshinanni woyte  
surrenke giddo addi additi godo'lenna heewo  
filiqqi yitunkekkinni digattanno. Ispoorte yaanno  
qaali giddosi duucha mannimmate millimmonni  
loonsannireнна babbaxxitino heewo amadanno  
qaaleeti. Konne mitto mittonka aanino garinni  
halashshine la"ate wo'naalleemmo.

Ispoorte budunna yannitte yaamante lame boosora gaamantara dandiitanno. Lamente mereero badooshshu hee'rirono yannitte ispoortera safonna kaimu budu ispoorteeti yaate dandiinanni.

Budu ispoorteeti yinanniti dagoomu giddo hundinni kayse boohaarshahonna gangalattote horoonsi'nanni godo'leeti. Godo'lannohuno qaaquulle, ooso, wedella, jajjabba, meya labbaaha lawishshaho seenne, mine assi'rino meento, qeedhoota, w.k.l ikkara dandaanno. Yannitte ispoorteeti yinanniti kayinni, yannate lopho ledi amadante kalaqantinota ikkita luphiima wodhonna jirte afidhe kalqoomu deerrinni afantannote.

Qarqarinkera egenninoommori lawishshaho lekkate kaasenna marawete kaase godo'le egennantinoreeti. Qoleno mannu, faradu, kaameelu, xexxerrisunna, shalleettete qolchansho heedhanno.

Kuri lawishshaholla kayinsoonnireetina babbaxxinohu ispoortete dani kalqete noota buunxanni. Xaa yannara addi addi heewo assinanniwa shinqe qarqarinkera la'neemmoti ispoortete godo'le addi addite. Saeno, televizhiinete daa"antanniti ninke gobbara nafa egennantinokkiti addi additi ispoortete godo'le noota qaaga dandiineemmo.

Aye garitano ikkituro ispoorte bisu millimmora safote. Konni gafi giddo aye qarqarirano hee'ne assinanniti bisu millimmo manchi beettira may horo uytannoro la"ate wo'naalleemmo. Layinkinna sayikki gafira, bisu millimmora hasiisannorena assa hasiissanno qoroworeno la'neemmoha ikkanno.

Baadiyyete qarqarira jawu hajame bisu millimmo loosannohu shaa"aho. Ikkollana, aja dume kaase godo'latenni, hootayyo kubbatenni, qolchanshotenni bisu millimmo assitanno.

Katammate qarqarira ajuno akkaluno hajame  
bisu millimmo assanno. Tini bisu millimmo isi horo  
afidhinonso mannu haafa yeella sheeqqi yaanno?  
Horose aanchine la'neemmo.

Addi addi xiinxallo gumi hajamme assinanniti bisu  
millimmo majja horo afidhinota reqeccishanno. Mannu  
bisu millimmo assate hajamikkinni hajosi tidhara  
dargunni darga lekkatenni ha'rara dandaanno. Tini  
lekkate millimmono umise horo afidhino.

Ikkollana, hajamme assinanniti bisu millimmo  
fakkana horo afidhino. Bisu millimmo horo giddo  
umiti akkimale kee'mille ajishate. Mitu mitu  
tunceenyinni lowo geeshsha du'mino manna  
la'nammora dandiineemmo. Kuni akkimalu kee'milli  
kalaqamannohu intoonni sagale liiqante



wolqate ragira soorrante horote aana hossukinni  
mannimmate giddo corantannohuraati.

Konni daafira konne akkimale kee'mille ajisha  
dandiinannihu yanna tunqe bisu millimmo  
assatenniiti. Konnirano, bisu millimmo assinanni  
woyte mannimmate giddo coramino du'milli woy  
akkimalu coomi daaqe wolqate widira soorramanno.  
Konne du'mille daaqissannoti ganyine yanna  
yannatenni soodo ikko hawarro assinanni bisu  
millimmooti.

Wole bisu millimmo horo dhibbu gargaroosheeti.  
Ganyine bisu millimmo loosatenni babbaxxino dhibbi  
amadannonkekki gede gargadha dandiineemmo.  
Ganyine bisu millimmo assatenni wodanu dhibba,  
mundeete xiiwonna, sukkaarete xisso gargadha  
dandiineemmo.

Wodanu xisso, mundeete xiiwo, sukkaarete xissonna  
wolootu intoonni sagale liiqante wolqate ragira  
soorrama hoogatenni kalaqantara dandiitannoreeti.  
Bisu millimmo assineemmoha ikkiro mannimmanke  
giddo wolqate ragira soorrantukkinni corantanno  
sagale daaqqannohura dhibba gargadha  
dandiineemmo. Togo yaa, dhibba kalaqqannoti  
mannimmate giddo corantanno sagale ikkasenni  
corantannokki assiniro kayinni hakku dhibbi hee'rara  
didandaanno yaate.

Bisu millommo assatenni afi'nanniti wole hisanyote.  
Dasso hoole, mannimma usussure, mannimmate  
aana mite gede bayi'rame, assinannire giwise  
egenninnohe? Mito woyte togoo macciishshamme  
galtankera dandiitanno.

Tenne yannara ususurame ofollantenni ka'ne  
bisu milimmo loonsummoro hisanyo afi'nammora  
dandiineemmo.

Coy gedera, 30 daqiiqi geeshsha lekkatenni  
hee'noommo qarqarira ha'rammeemmoha ikkiro tini  
millimmonke surrenke giddo hisanyo uytannonke.  
Tini millimmo surrenke bisimma baqqeessitannohura  
wona turujjo agurre hagiirraamma ikkinammora  
dandiineemmo. Mitore loosateno hisante ka'ne  
garunninna seekkine loosa hananfeemmo..

Qoleno, yanna tunqe assinanniti bisu millimmo wolqa  
kaajjishshanno. Mite yannara allaalenniwa sharro  
sharrammanni godo'linammora dandiineemmo. Wolqa  
kaajjadu dhuka laafinoha gaggasse masse uullate  
karasi digattannote. Babbaxxino looso loosatenni woy  
bisu millimmo assatenni wolqanke laafa ikkitannokki  
gede bisonke kaajjishi'ratenni dhuku laanfe gargadha  
dandiineemmo.

Baattote looso loossanno manninna, ganye bisu millimmo assanno manni wolqa lowo geeshsha kaajjitanno. Bisu millimmo hirrenke, miqqankenna giddoydinketa bisu kifilla dhaabbachishshannonna kaajjishshanno. Konni daafira, looso loonseemmo woyte seelenke dhaabbattanno daafira mannimmanke mule didaafurtanno. Bisu millimmo ganye loosanno manni dhuka bae wolqa quubbi yee dishaqqanno.




Bisu millimmo wole widoonni dagoomu ledο dancha namoomme kalaqate lowo geeshsha kaa'litanno. Bisu millimmo hee'nanni qarqarira callinni woy mittu manchi callisi fule loosa dandiinanniite. Mayira yiniro kayinni gaamo kalanqe mannu ledο mitteenni loosa dandiinanni. Mannu ledο mitteenni loonsanni woyte lame horo afi'nanni. Umiti baxille kaajjishshi'ra ikkitanna, layinkiti cee'manna hifatama huna ikkitanno.

Bisu millimmo mannu ledο mitteenni loosa mimmitu ledο baxille kalaqate kaa’litanno. Yanna yannatenni assinanni xaadi baxille mimmitu mereero baxille ledanni ha’rasinni sae ku’u ko’uyira danchare hedannoha assanno. Togoonna mimmitoho mararro kalaqanturo, qarru yannara kaa’lamme faffote yannarano mitteenni hagiidhine gallanni yaate. Qoleno, bisu millimmo mimmitu ledο hirrinsanni woy oso’linanninna godo’linanni loonsannihura hifantikkinni dancha bisu millimmo loosa dandiinanni. Konnira, bisu millimmo mannu ledο mitteenni loosa ikkado bisu millimmo loosatenna mannu woy dagoomu ledο dancha xaadooshshe kalaqate kaa’litanno yaate.

Bisu millimmo loosa manchi bettira uytanno horo aleenni kayinsita calla di”ikkitino.

Ikkado bisu millimmo loonsanniha ikkiro sagale seekke itate hasattono lexxitanno. Mite yannara babbaxxino korkaatinni mannu kokke cufinonke yaanna macciishshinammora dandiineemmo. Togoo manni bisu millimmo loosannoha ikkiro sagaleta hasattonsa lexxitanno yaate.

Xaphi assine la'niro bisu millimmo mannaho uytanno horo fakkanate. Ninkeno qarqarinkera ganyine bisu millimmo loosatenni dhibba gargadha, wolqanna hirrenke kaajjishshanna mannu ledi heedhannonke mittimma jawaachishi'ra dandiineemmo.



## Gafa Lame

### Bisu Millimmo Loosi'ra Hasiisannore

Bisu millimmo manchi beettira uytanno horo la"ate wo'naalloommo. Xa kayinni bisu millimmo loonseemmo woyte may may hasiisannonkero la"ate wo'naalleemmo. Ispoorte loonsanni woyte may hasiisanno? Tenne xa'mora ispoortete udiinni, xawu, kaasenna woluri hasiissannota xawisa dandiinanni. Ikkollana, bisu millimmo loonsanni woyte duuchuri hasiisara dandaanno. Kuri giddo qara qara ikkinoha aanchine la'neemmo.

Bisu millimmo loosira hasiisannori giddo umihu bisu millimmo loosira injaanno qarqaraati. Bisu millimmo xawoho woy nafara loosa dandiinanni. Ikkollana, xawu woy nafaru bisi millimmo loonsanni woyte mannu aana gawajjo abbannore afi'rinoha ikka dihasiissannosi.

Lawishshu gederu, bisu millimmo loonsanni dargi kinnaamo ikkiro, bisu millimmo loonsanni umbiro mannimmate aana gawajjo kalaqantara dandiitanno. Sabbaamunna bukaawino qarqari hattonni bisu millimmora di"injaanno. Konni daafira, bisu millimmo loonseemmo woyte keeraanchimmanke jifanno qarqara doodha dihasiissanno. Roore yanna bisu millimmo loosate hayisso noo xawo woy kinnanna buko afi'rinokki qarqara doodha hasiissanno.

Bisu millimmora hasiisannori giddo mitte ispoortete qodhooti. Ispoortete kanateera, bogge woy bijaamanna lekkate ayirritannokki koatte shara woy isiniikere ikkara dandaanno.



Miteekkine lekkate kaase godo'linoommo widoonni  
bisu millimmo loonseemmoha ikkiro taakkeettu koatte  
wodha dandiinanni.

Wodana assa hasiissannorilla woxu wolqa heedhuro  
aleenni xawinsita ispoortete udiinnicho hidhiniro  
danchaho. Udiinnu dinoe yine ofollantenni akkala  
bolaale lekka murre bogge seekki'ne bisu millimmora  
horonsi'ra dandiinanni. Kinnanna sabbu nookkiwa  
mulla lekkannino loosa dandiinanni.


Bisu millimmo loosate hasiisannori giddo mittu  
Mannimma Guunte Ogeeyyeeti. Bisu millimmo  
umiseta ikkitino wodhonna assootu aante afidhinote.  
Konni daafira, bisu millimmo loosiisanno ogeessi  
hee'riro danchaho.

Mitte mittenta mannimmanke milli assate assootu  
ha'rinsho no. Tini ha'rinshono sayinsetenni  
xiinxallinoonnite. Coy gedera, kaase godo'linammora  
albaanni mannimmanke diriirsi'ra hasiissannonke.

Korkaatuno, mininni dangoommo gedeenni  
ga'nineemmoha ikkiro musu'nammora woy maalcho  
ta'ankera dandiitanno. Konni daafira, babbaxxitinota  
bisu millimmo loosiisannonke ogeessi hee'riro ikkado  
bisu millimmo loosate kaa'lannonke.

Bisu millimmonni bande la'nannikkiti wole taaltino  
sagaleeti. Bisu millimmo loonseemmoha ikkiro  
taaltino sagale ita hasiissannonke. Taaltino sagale  
saga'linummokkinni bisu millimmo loonseemmoha  
ikkirō mannimmanke jaabbara dandiitanno. Bisu  
millimmo loonsummo gedensaanni dandaami bikkinni  
taaltino sagale saga'la hasiissannonke.

Taaltino sagale yineemmo woyite wolqanna  
iibille uytannota, biso dhaabbannotanna dhibba  
gargartannota amaddanno. Tini sagalete booso  
saadate wiinni afi'nannire, gide, laalonna gati  
kaashsho xaphi assite amaddanno. Ledeno,  
anganninna hayishshi'nanni wayino hasiisannonke.



## Gafa Sase

### Bisu Millimmora Assinanni Qorowo

Bisu millimmo loonseemmo woyite qoropha hasiissannonkeri bacuri no. Lawishshu gedera bisu millimmora kaa'litankera kaase godo'linammora dandiineemmo. Ikkollana, kaase kaameelaanchote godo'lineemmoha ikkiro kaameelu jaddo iillitankera dandiitanno. Konni daafi'ra bisu millimmo loosate xawo doodha hasiissannonke yaate.

Wole widoonni arrishsho batidhino yannaranna hattono xeenu bati're beleqanni hee'reenna bisu millimmo loosa dihasiissannonke. Korkaatuno arrishshotenna xeenu batinyi mannimmanke aana gawajjo abbannohuraati. Tenne giddo seekkine wodana assa hasiissannonkeri no. Hakkuno, aye dani ispoorte loosate ka'neemmo woyite balanxe loonsanni loosi mannimma woy biso diriirsi'ra ikkinota dea dihasiissanno.

Xaphi assine la'niro bisu millimmo manchi beettira uuytanno horo bacate. Qoleno, bisu millimmo loosate addi addi udiinnichinna taaltino sagale hasiissanno. Hakko bikkinni bisu millimmo loonseemmo woyite qoropha hasiissannonkerino dihooganno.

## Nabbawate gedensiidi xa'mo

Biddissa 2: Aante noo xa'mo niwaawete hedo garinni dawari.

1. Tini niwaawe marichire kultannote?
2. Ispoortete me"e boosora gaammanni?  
Hakkurina?
3. Bisu millimmo assate hasiisannori giddo qara  
qara ikkitinore sasere kuli.
4. Bisu millimmo assatenni afi'nanni horo maatiro  
xawisi.
5. Bisu millimmo jawahonso shiimaho  
hasiissannoha lawannohe? Mayra?

